


Noticia
Transparente
di Gobierno

ISLA ONLINE

Diahuebs 18 Januari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



Den cuadro di Dia Di Betico,

MUCHANAN DI KLAS 5 DI REINA BEATRIX SCHOOL A DUNA PROME MINISTER UN PRESENTACION RIBA E BIDA DI BETICO

**"Mi ta sumamente satisfecho pa wak con bon prepara e dos klas 5 nan aki
ta y cuanto informacion nan tin di e dia importante aki"**



Den cuadro di celebracion di Dia di Betico, Prome Minister Evelyn Wever-Croes a bishita Reina Beatrix School klas 5, pa mira con e muchanan ta prepara pa e dia importante aki. Prome Minister a expresa di ta sumamente satisfecho pa wak con bon prepara e dos klas 5 nan aki ta, y cuanto informacion nan tin di e dia importante aki.

Durante su bishita, e muchanan di klas 5 a duna Prome Minister un presentacion riba e bida di Betico, y despues a combersa riba diferente aspecto, y a haci hopi pregunta cu Prome Minister a contesta. Na final di su bishita, Prome Minister a despedi lagando e muchanan cu un mensahe importante; El a bisa nan cu semper nan mester corda ken Betico ta y tur

loke el a haci pa Aruba, y cu den cada un di nan tin un Betico scondi. Prome Minister a splicanan cu tempo, nos Libertador, Betico Croes tabata chikito, e tabata mescos cu nan, e tabata gusta haci deporte, y tabata tin un pasion pa musica, pero mas importante e tabata tin un amor grandi pa su pais, Aruba. "Mi ta sigur cu cada un di e muchanan aki tin un Betico den nan, y ta importante pa nan purba na desaroya e caracteristicanan aki, pa asina por hiba pais Aruba dilanti," Prome Minister a expresa.

Prome Minister ta gradici e cabesante di Reina Beatrix School, señora Rosalinda Granger y tur otro docente pa nan dedicacion y trabou duro pa cu futuro di nos muchanan. ■■■



Prome Minister Evelyn Wever-Croes: **Riba su prome dia di bishita na e scolnan en conexion cu Dia di Betico:** **FATIMA COLLEGE CU HOPI ENTUSIAMO A RICIBI** **PROME MINISTER**



Diahuebs mainta 18 di januari, Prome Minister Evelyn Wever-Croes a cuminsa cu su bishitanan tradicional na varios scol en conexion cu Dia di Betico. Riba 25 di Januari, Aruba ta celebra e fecha natal di Gilberto François ‘Betico’ Croes. Durante varios aña caba, e dianan prome cu e gran celebracion, Prome Minister ta pasa bishita diferente scol y asina conta un tiki di e historia di Betico, su lucha, su bida y tur e sacrificionan cu el a haci pa nos dushi isla Aruba.

Un di e scolnan cu Prome Minister a bishita riba e prome dia ta Fatima College na Dakota.

Akinan e mandatario a wordo ricibi cu hopi entusiasmo y a keda masha contento di wak con bunita e klasnan ta dorna pa e ocasion aki.

Alumnonan di klas 4 y 5 a bin cu presentacionnan hopi interesante y nan a haci varios pregunta y tambe por a wak cu nan tawata bon prepara pa responde tur pregunta di nos Prome Minister. E mandatario a gradici cabesante y docentenan pa nan atencion cu nos muchanan en general pero specialmente cu e celebracion di Dia di Betico.

Prome Minister a expresa cu e muchanan tawata sumamente encanta cu e tema aki y cu e a sinti un un emocion grandi di tende nan papia di e lucha y logronan di Betico y e importancia cu esaki tin pa nan mes. “Nos tur tin un Betico den nos y akinan mi a topa hopi cu den prome bista bo ta weita cu nan ta bay haci cosnan grandi pa Aruba.”







MINISTER

Ursell Arends

GRUPO DI LORA CU A WORDO RESCATA AWO LIBER DEN NOS NATURALES



Diaranson 17 di januari Minister di Naturalesa tabata tin e honor pa ta presente durante e reintroduccion di e di tres grupo di lora cu a wordo rescata algun tempo atras. Durante e prome simannan di januari dos grupo a wordo laga den libertad.

E reintroduccion di lora ta bou encargo di Fundacion Parke Nacional Aruba(FPNA) y ta forma parti di nan programa di conservacion y reintroduccion di especie na Aruba.

Despues di 76 aña, e Lora cual ta un especie nativo na Aruba, Boneiro y Venezuela, ta bek pa engrandece nos biodiversidad. Contrario na creencia popular, nan populacion a disminui dor cu a hincanan den captivity pa tene como mascota. Na 2022 a logra rescata un total di 25 lora cu a wordo trafica ilegalmente y reintroduci den naturalesa.

E Lora ta un bestia cu nos como rubiano mester proteha y respeta. Pa es motibo FPNA y Ministerio di Naturalesa ta pidi asistencia di comunidad pa cu nan bienestar.

Tur ciudadano por yuda door di respeta e Lora y mantene distancia. Mantene pushi of cacho na un distancia di e Lora. No cria y tampoco purba di captura e Lora. Capturando Lora ta viola e ley cu ta proteha e especie di parha aki. Keda vigilante y si mira e Lora, porfavor reporta esaki via Whatsapp na FPNA su Wildlife Hotline na +297 5924476 of manda un email na infor@arubanationalpark.org.

Minister Arends ta gradici tur cu tabata involvi pa rescata e Loran cu sigur lo beneficia nos ecosistema. ■

MINISTER URSELL ARENDS TA ANUNCIA FECHANAN PA BAKI DEN BARIO 2024

Durante conferencia di prensa diahuebs 18 di januari Minister Arends a elabora ariba e iniciativa di Baki den Bario cual ta forma parti di e campaña nacional Limpi Limpi.

E ministro a cuminsa na duna resumen di Baki den Bario 2023. Durante e 11 fechanan di Baki den Bario 2023 a conta mas cu 4998 vehiculo cu a bin haci uzo di e evento y a logra colecta 781 baki di desperdicio. Tene na cuenta cu e cantidad di vehiculo ta exclui e conteo di e prome actividad na San Nicolas.

Segun Minister Arends e tabata 11 dia intensivo, unda cu di madrugada e team a prepara na e localidad. Un team cu pa oras largo riba pia den solo cayente a para cla pa yuda e comunidad. Esaki ta un esfuerzo conhunto pa por a atende un averahe di 500 vehiculo cu a trece nan sushi. "E team di Baki den Bario a demostra sincronisacion y dedicacion cual sigur nos ta orguyoso di mira," Minister Arends a reacciona.

Parti di e meta di campaña nacional Limpi Limpi, bou di cua Baki den Bario ta forma parti di, ta pa conscientisa nos habitantenan acerca di e procesamiento responsabel di desperdicio. E gran acohida di Baki den Bario den nos comunidad ta un muestra cu Aruba ta cla pa separa y adopta habitonan mas sostenibel di anda cu nos desperdicio.

Durante 2024 nos lo organisa Baki den Bario un biaha pa luna, na diferente distrito/bario. Diaranson siman pasa Minister Arends a reuni cu e partnersnan pa haci evaluacion y scoge e dianan pa 2024. Ditricto y localidad cu a scoge ta basa riba e experiencia di ultimo aña pero tambe datos y experiencia di pasado, relatando na desperdicio produci den cada bario cual ta inclui cantidad di vivienda/famia den e bario.

"Mi a tuma e decision pa continua cu Baki den Bario despues di a analisa sentimentonan den nos comunidad cu ta expresa e necesidad pa e iniciativa aki y basa riba demostracion cu nos comunidad ta dispuesto pa separa. Nos ta dispuesto pa transiciona pa un maneho di desperdicio cu ta cuadra cu e tempo cu nos ta bibando aden. Maneho di desperdicio ta keda un responsabilidad comparti. Gobierno di Aruba ta facilita manera pa deshaci di bo desperdicio y abo como ciudadano mester haci di bo parti pa separa y deposita esaki debidamente pa wordo procesa. No solamente durante e actividad di Baki den Bario pero mester ta consciente di bo desperdicio tur dia," Minister Arends a enfatisa.

Ariba e website www.limpi.aw por haya tur informacion di e fechanan di Baki den Bario 2024 y tambe pa mas informacion di unda pa hiba bo desperdicio.

E prome dia di Baki den Bario pa e aña aki lo ta 27 di januari



2024 na Compleho Deportivo Pos Chikito. Orario ta keda di 7'or pa 11'or di mainta. Prepara y separa bo desperdicio di antemano.

Ministerio di Naturalesa lo sigui e proceso di Baki den Bario di cerca pa asina keda mehora e actividad y su efectonan ariba nos isla.

Minister Arends a termina gradiciendo tur cu a contribui na Baki den Bario pa nan trabou grandi y significativo. Aruba henter a tuma un paso importante den e bon direccion y hunto nos lo crea un isla cu un maneho di desperdicio mas sostenibel y responsabel. ■■■■



MINISTER MADURO A REUNI CU DIRECTOR GENERAL ENCARGA CU ADUANA NA HULANDA, SRA. NANETTE VAN SCHELVEN

Aduana Hulanda lo brinda asistencia na e team di maneho di Aduana Aruba

Durante su biahe di trabou na Hulanda den luna di november 2023, Minister Maduro di Finansa hunto cu director di Aduana sr. Ricky Croes a reuni cu e Director General encarga cu Aduana na Hulanda, sra. Nanette van Schelven.

E meta di e bishita tabata pa haci un peticion pa asina por haya asistencia y sosten necesario di Aduana Hulandes pa por fortifica y profesionalisa Aduana na Aruba. Banda di esaki, Minister Maduro a haya e oportunidad tambe pa cera conoci cu e teamnan di maneho di Aduana cu a reuni cu otro den cuadro di e programa 'Versterking Grenstoezicht' den Reino Hulandes.

Mester bisa cu e peticion di Minister Maduro a wordo honra y den cuadro di e proyecto di 'Versterking Grenstoezicht' e team di maneho di Aduana di Aruba lo ricibi e sosten necesario di e experto di Aduana sr. Jan Kamp kende cu ya caba den e prome siman di aña 2024 a cuminsa cu e trabounan necesario pa fortifica y profesionalisa e Cuerpo di Aduana na Aruba.

Minister Maduro ta gradici e ekipo di Aduana Hulandes lidera pa sra. Nanette van Schelven pa e bon reunion y e cooperacion pa brinda asistencia tecnico na bienestar di Aduana di Aruba.



MINISTER MADURO A REUNI CU ARUBA SU REPRESENTANTENAN NA WASHINGTON Y NA HULANDA

Recientemente Minister Maduro a reuni cu sra. Zulema Dabian-Erasmus, sr. Ady Thijsen y sr. Andy Lee kendenan ta representa Aruba na respectivamente na Washington y na Hulanda.

GevMinUSA

Sra. Zulema Dabian-Erasmus ta Aruba su Minister Plenipotenciario nobo na Washington DC. Pa Minister Maduro ta importante pa por conta cu e asistencia di Aruba su Minister Plenipotenciario na Washington (GevMinUSA) na momento cu ta atende IMF y World Bank su Spring y Annual Meetings. Ta importante pa nos GevMinUS ta bon informa tambe di tur locual ta e trabounan cu CARTAC, cu ta IMF su asistencia tecnico pa paisnan den Caribe, ta haci pa Aruba riba e tereno economico y financiero. Banda di esaki nos GevMinUSA ta yuda pa establece y mantene e lasonan cultural cu Aruba tin cu Merca, y ta yuda pa nos por keda den contacto cu e Arubianonan residencia na Merca. Minister Maduro ta desea nos GevMinUSA sra. Zulema Dabian-Erasmus hopi exito den su reto nobo na bienestar di Aruba.

GevMinNL

Minister Maduro a reuni fin di aña tambe cu Aruba su Gevolmachtigde Minister na Den Haag, sr. Ady Thijsen. Pa Minister di Finansa ta importante cu sr. Ady Thijsen como nos GevMinNL cu ta representa Aruba den Consejo di Minister di Reino, ta bon informa di tur e trabounan cu ta wordo haci principalmente pa por logra e estabilidad financiero di Aruba. Pa e motibo aki regularmente ta tene nos GevMinNL na altura di e desaroyonan, specialmente pa locual ta trata e supervision financiero di Aruba.

Staatsraad Aruba

E siman aki Minister Maduro a reuni cu sr. Andy Lee kende recientemente a keda apunta como Aruba su Staatsraad na Raad van State, cu ta e Colegio Halto di Reino Hulandes cu ta percursa pa duna conseho na e Gobiernonan den Reino. Ta importante pa Aruba su Staatsraad tambe ta bon na altura di tur locual ta e esfuersonan cu ta wordo haci pa recupera Aruba su credibilidad financiero y tambe estabilisa e finansa publico di nos Pais. Ta importante pa na Hulanda e instancianan cu ta tuma decision y ta brinda conseho tin un bista real di e situacion financiero di Aruba, y pesey ta nos trabou pa e informacion aki yega na e manera formal y informal. Minister Maduro ta desea sr. Andy Lee hopi exito como nos Staatsraad na Den Haag.



BIN CELEBRA

DIA DI BETICO



Comision Celebracion Dianan Nacional



Gobierno di Aruba

24
JAN

MANIFESTACION CULTURAL

Orario: 8:00 pm – 10:30 pm

PROGRAMA

Orkesta bou direccion di
e Maestro Dwight Leoneta.
Típico Colegio Arubano,
Show di baile

6:00 PM

Feria culinario,
boca dushi y artesanía.

25
JAN

CEREMONIA PROTOCOLAR

Orario: 9:00 am – 10:30 am

**Na Plaza
Libertador G.F. Betico Croes**

**BETICO,
E LIDER STIMA
PA SU PUEBLO**



MINISTER

Geoffrey Wever

MINISTER GEOFFREY WEVER A DUNA PRESENTACION DI SUSTAINABLE DEVELOPMENT GOALS NA ALUMNONAN DI SCHAKEL COLLEGE



Cuminsando e siman aki Schakel College ta host un "Model United Nations Project Week", den cual e alumnonan lo siña tambe over e Sustainable Development Goals. Riba peticion di Schakel College, Minister Geoffrey Wever a duna un presentacion na alumnonan di leerjaar 2 mavo-havo-vwo di Schakel College.

Di un manera interactivo Minister Wever a splica e metanan di desaroyo sostenibel na e alumnonan, y e retonan cu ta rekeri colaboracion di tur persona den sociedad, y e metanan cu kier logra door di accionnan continuo. For di e alumnonan tabatin basta interes y afinidad cu e topico, y tambe algun preguntanan critico.

Desaroyo sostenibel a ser defini como desaroyo cu ta cubri e necesidadnan di e presente sin compromete e abilidad di futuro generacionnan pa por cubri nan propio necesidadnan. Pa logra esaki mester tin harmonia entre e aspecto humano,

balansa den desaroyo economico y prosperidad, y tambe proteccion pa nos medio ambiente.

E Metanan di Desaroyo Sostenibel ta consisti di 17 metanan riba cual paisnan ta traha pa alcanza den nan contexto nacional. E metanan ta: 1. Caba cu pobresa; 2. Caba cu hamber; 3. Salud y bienestar; 4. Enseñansa di calidad; 5. Igualdad di genero; 6. Awa limpi; 7. Energia limpi y economico; 8. Trabou decente y crecemento economico; 9. Innovacion y infraestructura; 10. Reduci desigualdad; 11. Barionan y comunidadnan sostenibel; 12. Produccion y consumo responsabel; 13. Accion riba clima; 14. Bida bou awa; 15. Bida riba tera; 16. Paz, husticia y institucionnan formalisa; 17. Partnership pa logra e metanan.

Minister Geoffrey Wever: "Un danki na Schakel College pa e invitacion y hopi exito na e alumnonan durante e project week y nan estudio!"



MINISTER ENDY CROES HUNTO CU STICHTING SPORTSUBSIDIE A REPARTI 4.3 MIYON FLORIN NA TUR FEDERACION DEPORTIVO

E subsidio a aumenta di aña 2022 pa 2024 cu 2.1 miyon florin



Diaranson ultimo, Minister di Enseñansa y Deporte Endy Croes a reuni cu tur federacion deportivo na Aruba pa haci entrega di subsidio di aña 2024. Tambe presente na e ocasion aki tabata e presidente di Hunta di Supervision di Stichting Sportsubsidie (SSA) Sr. Hervé Ruiz cu a hiba palabra y a introduci e miembranan di directiva, comision tecnico y "bestuurder" di SSA. Minister Endy Croes a duna un splicacion di, entre otro, reglamento di SSA, vision di turismo deportivo, proyecto di Sport Management & Event Management y di e deportistanan cu ta pidi placa riba caya.

Fuera di esaki, Minister Endy Croes a indica cu tin algun federacion deportivo cu no ta ricibiendo placa, pa motibo cu no ta cumpli cu cierto rekisito. Minister Endy Croes a haci un peticion na e presidente actual di e Hunta di Supervision di SSA pa reuni cu e federacionnan aki pa yega na un plan concreto pa asina nan tambe por cumpli cu e condicionnan y cuminsa ricibi subsidio. Tambe, e mandatario di Deporte a informa e federacionnan cu Premio Excelencia den Deporte (PED) lo tuma e luga e aña aki den e luna di april y a pidi cooperacion di tur federacion deportivo pa entrega nomber di nan nominadonan na tempo. Na final di e anochi, Minister Endy



Croes y SSA a reparti subsidio na 36 federacion deportivo.

Minister Endy Croes a splica cu di aña 2022 pa 2024, e subsidio a aumenta cu 2.1 miyon florin. Pues, den total a otorga 4.3 miyon florin di subsidio na tur federacion deportivo pa aña 2024. Pa finalisa, Minister Endy Croes a indica cu e tabata un anochi exitoso y ta desea e federacionnan deportivo hopi exito e aña aki. Cu deseo, disciplina, determinacion y dedicacion ta logra. ■■■

MINOR KONINKRIJKSRELATIES CU PRESENTACION PA STIMULA E LASONAN CU STUDIANTENEN



Durante di un encuentro na Haagse Hogeschool a tuma lugar un presentacion di un grupo di estudiante di “Minor Koninkrijkszaken”. Presente tabata Minister Plenipotenciario mr. Ady Thijsen y directora di Arubahuis mr. Joselin Croes. E grupo di studiantenan a tene un presentacion riba nan “adviesrapport” cu tin como titulo “Verbonden blijven – weg terug naar Aruba”. Esaki tabata un encargo di Arubahuis y e studiantenan cu a traha riba e encargo aki tabata Jort van Poeteren, Raymon de Jong, Dannah Geerman y Nora Korevaar. “Minor Koninkrijkszaken” ta parti di e facultad “Bestuur, Recht en Veiligheid” di Haagse Hogeschool.

Meta di e encargo tabata pa bin cu instrumentonan con Arubahuis lo mester engrandese e lasonan cu e grupo di studiantenan Arubiano na Hulanda. Pa e rapport aki nan a entrevista studiantenan Arubiano y esaki a conduci na recomendacionnan pa con por logra yega na mihor contacto cu e studiantenan. Un di e sugestionnan ta pa haci mas uso

di rednan social. Actualmente Arubahuis ta hopi activo riba Facebook, pero lo mester expande esaki door di haci mas uso di por ehempel Instagram y LinkedIn, cu ta rednan social cu ta hopi usa bou di hobennan. Tambe a bisa cu lo ta bon pa amplia e guia di studiantenan door di e studiementor pa henter nan estudio. Awor aki e studiantenan ta haya guia di un studiementor unicamente den nan prome aña di estudio. Otro punto cu a bin padilanti ta lo mester organisa mas encuentronan cu studiantenan y asina Arubahuis lo por keda den contacto y den dialogo cu nan.

Minister Thijsen a gradici e grupo di studiantenan pa nan rapport y a bisa cu tin hopi recomendacionnan cu ta hopi util y importante pa Arubahuis por fortalisa e lasonan cu nos studiantenan. E “adviesrapport” aki ta un comienso y e ta duna indicacion cu mas investigacion na e situacion di studiantenan na Hulanda ta na su lugar. E mandatario a para keto na kico ta e efecto di tin bon relacion y tin bon bista riba e grupo di studiantenan Arubiano na Hulanda. Minister Thijsen a bisa cu ta importante pa traha riba maneho pa stimula nos studiantenan pa regresa Aruba despues di nan estudio. Segun e mandatario esaki ta di suma importante, pasobra door di e “vergrijzing” – e cantidad di personan cu lo bai cu pensioen - Aruba lo mester di hopi trahador pa mantene e nivel e crecimiento economico actual. Sr. Thijsen ta kere firme cu esaki ta e momento pa stipula maneho pa yena e cuponan di trabao aki cu nos mesun hendenan. Un bon forma pa logra esaki lo ta un Acuerdo Social entre Gobierno y gremionan sindical y gremionan commercial (partnernan social).



Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD